



Uunga:  
Kristian Jeremiasen (S)  
-MAANI

## Air Iceland pillugu §37-mut akissut

25. feb 2011  
Sagsnr. 2011-046493  
Dok. Nr. 572370

Apequtinnut imaattumut qujanaq:

Postboks 1037  
3900 Nuuk  
Tlf. (+299) 34 50 00  
Fax (+299) 32 46 14  
E-mail: oed@nanoq.gl  
www.nanoq.gl

1. **AirIceland-imik Naalakkersuisut angallannissamik isumaqatigiissuteqarneranni nunatta karsiat qassinik akiliiva?**
2. **Isumaqatigiissut qanoq sivilutigisumik atuutissava?**
3. **AirIceland-imik isumaqatigiissuteqarnermi innuttaasut atorfiluungitsut akikinne-rusumik angalasalissapat?**
4. **Air Iceland-imik isumaqatigiissuteqarnerup kingorna Air Greenland-imi suliasakin-nerulerneq pissutigalugu sulisunik soraarsitsisoqassava?**
5. **Air Greenland aningaasanik qanoq amerlatigisunik annaasaqassava?**
6. **Nunap iluani timmisartuussinermi akit qaffassapat?**
7. **Nunanut allanut angalanerme aamma atorfiluungitsut angalanissaannut akikillissaa-nissamik pilersaaruteqartoqarpa?**
8. **Naalakkersuisut annilaangatinngilaat aningaasat avammut annissorneqartut amer-linissaat Air Iceland-imik isumaqatigiissuteqarnerup kinguneranik?**

1: Angalariaatsit allangortinnagit Air Icelandimik isumaqatigiissut Nunatta Karsianut iluaqutaassaaq, Island aqutugalugu angalasareernerit sipaarfiussammata.

Angalariaatsit allangortinnerisigut Nunatta Karsianut sunniutissai siullittuutigineqarsinnaangillat apequtit inuiaqatigiit aningaasaqarniarnerinut tunngasut arlalissuit eqqarsaatigineqartariaqarmata. Tamatuma saniatigut Nunatta Karsianut sunniutissat eqqarsaatigalugit apeqqutaassapput Air Icelandip angallavinni aalajangersimasuni unammillerluni timmisartuussisalerneqatigut aammalu timmisartuussisartunit allanit siunissami angallassisalersinnaannissat eqqarsaatigalugit Air Greenlandip aamma Mittarfeqarfiit qanoq iliorlutik naleqqussarnissaat.

Air Icelandimik isumaqatigiissut timmisartuussisarnerit eqqarsaatigalugit inuiaqatigiit aningaasaqarniarnikkut inissisimanageranut aallaaviatigut pingaaruteqannginnerusussatut nalilerneqarpoq tassunga ilanngullugu Mittarfeqarfinnut Nunatta Karsiata naatsorsuutaani suliffeqarfittut namminersortitatut ilaasumut.

Naatsorsuutigineqartariaqarpoq pisiortornissamik isumaqatigiissutigineqarsimasut ilaasut maannamit amerlanerusut Island aqutugalugu angasalernissaannik kinguneqassasut. Tamanna Mittarfeqarfiit aningaasatigut isertitakinnerusalerneranik kinguneqarsinnaavoq timmisartut akunnillutik mittarnerinit ilaasunut akitsuutinit isertitarisartakkaminik annaasaqartalerneqatigut. Taamaasilluni Mittarfeqarfiit-init nalilerneqarpoq, Island aqutugalugu timmisartuussisoqartartillugu ilaasut akitsuutaanit kaaviiartittakkatik ima annikilleriaateqassasut (DKK-inngorlugit naatsorsukkat):

Island aqqusaarlugu ilaasut	1.000	2.000	5.000	10.000
Annaasat – ukiunnerani akitsuutit	522.080	1.044.160	2.610.400	5.220.800
Annaasat – aasaanerani akitsuutit	744.640	1.489.280	3.723.200	7.446.400

Maligiuk ukiunnerani akiitsuutinit aasaanerani akitsuutinit kaaviiartitat appariaataat assigiinnginnerat, ukiunnerani aasaanerani akitsuusersuisarnerit assigiinngimmata.

Kaaviiartitatigut annaasat siuliani saqqummiunneqartut anguneqassappata ullumikkut ilaasorineqartartut amerlassusaat taamaaginnartariaqarput. Mittarfeqarfiit kaaviiartittagaasa appariarnerisa kingunerissavaa ingerlatsinermut aserfallatsaaliuinerinullu annertunerusumik tapiissuteqartariaqarnissaq imaluunniit Mittarfeqarfiit aningaasartuutigisartagai aamma/imaluunniit isertitarisartagai naleqqussartariaqarnissaat.

Naatsorsuutigisariaqarpoq Atlantikoq qulaallugu timmissartuussisarnertigut unammilleqatigiinnerup annertusineratigut taamaasillutillu akit appariarnerisigut nunatsinnut angalasartut amerleriarnissaat. Tamanna inuiaqatigiit aningaasaqarniarneranut pitsaasumik sunniuteqassaaq soorlu takornariartitsineq eqqarsaatigalugu aammalu nunatsinni inuussutissarsiutinut allanut aamma Mittarfeqarfiit-inut. Ilanngullugittaaq isiginiarneqartariaqarput aatsitassarsiornikkut ineriartornerup kingunerisaanik pisariaqartitsinerit annertusiartornissaat.

Taamatut oqareerluni ilanngullugu oqaatigisariaqarpoq inuiaqatigiit aningaasaqarniarneranut sunniutissat tassaammata timmisartuussisarnerit ammaaneqariartornerisa sunniutai, ukiuni kingullerni timmisartortitseqatigiiffiit allat nunatsinnut timmisartuussisalerinissamik qinnuteqartartut akuerineqartalerisigut. Taamaattumik Namminersorlutik Oqartussat Air Iceland-imik isumaqatigiissutaat timmisartuussisarneq eqqarsaatigalugu inuiaqatigiit aningaasaqarniarnerani ineriartornermut tamakkiisumut pingaaruteqanngitsutut isigineqartariaqarpoq.

2: Isumaqatigiissutip atuukkunnaarnissaa piffissalerneqarnikuunngilaq.

3: Aap. Angalanernut Namminersorlutik Oqartussanit akilerneqartunit atorneqarsinnaassaaq. Atorfillit angalasarnerisa saniatigut qinikkat, ilinniagaqartut, napparsimasut il.il. isumaqatigiissut atorsinnaassavaat.

4 aamma 5: Nalilerneqarpoq isumaqatigiissut namminerisaminik Air Greenlandimut sunniuteqassasoq, tassunga ilanngullugu sulisoqarnermut. Naatsorsuutigisariaqarpoq timmisartuussisarnikkut tamakkiisumik ineriartorneq amerlanerusut timmisartuussisalerisigut Air Greenlandimut sunniuteqassasoq.

Air Greenlandip nammineq atorneqarani timmisartortitseqatigiinnit allanit Danmarkimut Island aqqusaarlugu siumut utimullu timmisartuussisoqartalerneqatigut kaaviiartittakkamigut annaasassani tullinguuttuni saqqummiunneqartuni naatsorsorsimavai (DDK-inngorlugit naatsorsukkat):

Island aqqusaarlugu ilaasut	1.000	2.000	5.000	10.000
AG-mi kaaviaartitatigut annaasat	8.335.986	16.671.972	41.679.931	83.359.862

Tassunga tunngatillugu pingaaruteqarpoq erseqqissaatigissallugu kisitsisit saqqummiunneqartut tassaammata annaaneqarsinnaasut, taamaattumillu kisitsisit tassaangitsut timmisartortitseqatigiiffiup naatsorsuutimini annaasassavii.

6: Pisinermut isumaqatigiissut tamatumunnga annertunerusumik sunniuteqassanngitsut nalilerneqarpoq.

Air Greenlandimi maannakkut akigitinneqartut tassaapput aqquutit niuernikkut aningaasarsiutaasut, Air Greenlandimut aqquutit aningaasanik isertitsissutaanerunit isertitat ilaat (assersuutigalugu Nuummiit Kangerlussuarmut/Kangerlussuarmiit Nuummut aqquut) aqquutinut isertitsissutaannginnerusunut (assersuutigalugu Nuummiit Paamiunut/Paamiuniit Nuummut aqquut) nuunneqartussanngorlugit.

Angalatitseqatigiiffiit arlallit ilaasussanik aalajangersimasunik ilaasussarsionermi imminnut unammineranni niueqatigiinnerup iluani tamakkiisumik ammanerulersitsinerup kingunerisaanik aqquutit isertitsiffiusunit iluanaarutit aqquutinut isertitsiffiunngitsunut nuussisinnaaneq ullumikkut ittoq ajornarsissaaq. Tamanna immi ajortup tungaanut ingerlanerunngilaq. Taamatulli ingerlasoqaratarsinnaanerata eqqarsaatiginissaa pingaaruteqarpoq.

Tamanna ima isumaqarpoq, aqquutini arlalinni maannakkut akigitinneqartut appartinneqarnerannik, soorunami aqquutini pineqartuni angalarusussutsumik ersersitsisuussapput, kisiannili aamma orninniakkat ilaannut akit qaffassinnaapput imaluunniit timmisartumik tikkineqartarnerit ikilillutik.

Akit naleqquttuunissaasa kiisalu timmisartuussinerit amerlassusaasa akuersaarnartumiinnissaasa qulakkeernissaat siunertaralugit kingunerisaasa ilagisinnaavaat Nunap Karsiata ullummikkornit amerlanerusunik angalanermi orninniakkat ilaannut kiffartuussinermik isumaqatigiissusiortariaqalersinnaanerani. Pivusorsiorpalaarneruvorli kiffartuussinermik isumaqatigiissutit pillugit aalajangernerit ingerlatseqatigiiffinni siulersuisunit aalajangerneqaratik angallassiffinnilu aningaasarsiutaasuni sinneqartoofiit sinneqartuunngitsunik matussusiisarnerat pinnagit aningaasanut inatsisikkoorlugit ammasumik ingerlanneqarata. Akit angallaffinni kiffartuussinermik isumaqatigiissusiortifigineqarsimasuni (nunap immikkoortuini timmisartuussinermiunerusoq) isumaqatigiissummit kalluarneqassanngilluinnarput, kiffartuussinermit isumaqatigiissutit tamavimmik toqqaannartumik Nunap Karsianit aningaasalersorneqarmata.

7: Naalackersuisut aallaavittut Namminersorlutik Oqartussat sinnerlugit pisiniartarnermi isumaqatigiissusiortinnaapput. Siusinnerusukkut oqaatigineqareersut, angalanerit Namminersorlutik Oqartussanit aningaasalersorneqartut isumaqatigiissutaasimasup iluaniimmata, tassa atorfillit, politikerit, ilinniartut, napparsimasut il. il. angalaneri.

8: Naamik, Namminersorlutik Oqartussat isumaqatigiissummik atuineratigut angalanermi aningaasartuutikillisaanissaat siunertaasimavoq.

Air Iceland isumaqatigiissusiortoqanngikkallarmalli Namminersorlutik Oqartussanit angalanermut atatillugu atorneqartarsimavoq. Taamaattumik angalanermut ataatsimut aningaasartuutit annikillisarneqarnerat aningaasaqarnikkut imminut napatissinnaanerunissap pitsaanerusumik tunngavissinneqarnissaatut isigineqarpoq.

Inussiarnersumik inuulluaqqusillunga

Palle Christiansen